



Broj: 06-1-07-1-4899/22  
Sarajevo, 13.12.2022. godine  
(E.K)

Na osnovu člana 2.9 stav (1) tačka 17, a u vezi s članom 10.16 stav (2) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 52/22 i 67/22), Centralna izborna komisija Bosne i Hercegovine je na 96. sjednici, održanoj 13.12.2022. godine, donijela

### **O D L U K U**

#### **o primjeni člana 10.16 stav (2) Izbornog zakona Bosne i Hercegovine i ponovnoj raspodjeli mandata delegatu iz reda Ostalih u Dom naroda Parlamenta Federacije Bosne i Hercegovine**

Dodjeljuje se mandat delegata u Domu naroda Parlamenta Federacije Bosne i Hercegovine iz reda Ostalih neizabranim kandidatima s kandidatske liste poslanika Albina Zuhrića iz Skupštine Kantona Sarajevo; kandidatske liste Socijaldemokratske partije BiH iz Skupštine Kantona Sarajevo i kandidatske liste Naša stranka 1 iz Skupštine Kantona Sarajevo koje imaju najveće količnike, i to:

- a) **Albin Zuhrić**, količnik (1,00),
- b) **Kenan Magoda**, količnik (1,00) i
- c) **Vibor Handžić**, količnik ( 0,67).

### **O b r a z l o ž e n j e**

Odredbom člana 10.10 Izbornog zakona Bosne i Hercegovine propisano je da kantonalna zakonodavna tijela biraju 80 delegata u Dom naroda Parlamenta Federacije Bosne i Hercegovine, 23 iz reda bošnjačkog, 23 iz reda srpskog, 23 iz reda hrvatskog naroda i 11 iz reda Ostalih.

Nakon provedenog prvog kruga izbora delegata u Dom naroda Parlamenta Federacije Bosne i Hercegovine i uvidom u odluke o utvrđivanju rezultata posređenih izbora u prvom krugu izbora delegata iz reda Ostalih, Centralna izborna komisija Bosne i Hercegovine je utvrdila da je izabrano ukupno pet (5) delegata iz reda Ostalih u Dom naroda Parlamenta Federacije Bosne i Hercegovine od potrebnih 11, te da je šest (6) mjesta ostalo nepopunjeno.

U skladu s odredbom člana 10.16 stav (2) Izbornog zakona Bosne i Hercegovine, Centralna izborna komisija Bosne i Hercegovine vrši ponovnu raspodjelu mjesta koja se ne mogu popuniti iz jednog kantona odmah po završetku prvog kruga izbora delegata u Dom naroda Parlamenta Federacije Bosne i Hercegovine u svim kantonima.

Nadalje, Centralna izborna komisija Bosne i Hercegovine vrši preraspodjelu tog mjesta neizabranom kandidatu koji ima najviši količnik na svim listama koje se kandidiraju za odgovarajući konstitutivni narod ili za grupu ostalih u svim kantonima.

U postupku izbora delegata u Dom naroda Parlamenta Federacije Bosne i Hercegovine, Centralna izborna komisija BiH ovjerila je za izbor delegata iz reda Ostalih sedam (7) kandidatskih listi iz svih kantona. Uvidom u rezultate posrednih izbora iz svih kantona i dodijeljene mandate utvrđeno je da su na ovjerenim kandidatskim listama preostala još tri (3) neizabrana kandidata iz reda Ostalih i to: na kandidatskoj listi poslanika Albina Zuhrića iz Skupštine Kantona Sarajevo, na kandidatskoj listi Socijaldemokratske partije BiH iz Skupštine Kantona Sarajevo i na kandidatskoj listi Naše stranke 1 iz Skupštine Kantona Sarajevo.

Imajući u vidu naprijed navedeno i činjenicu da su ispunjeni svi zakonski uslovi za ponovnu raspodjelu mandata, Centralna izborna komisija Bosne i Hercegovine je, u skladu s članom 2.9 stav (1) tačka 17, a u vezi s članom 10.16 Izbornog zakona Bosne i Hercegovine, odlučila kao u dispozitivu ove odluke.

Ova odluka stupa na snagu danom donošenja i objavit će se na internet-stranici Centralne izborne komisije Bosne i Hercegovine [www.izbori.ba](http://www.izbori.ba), i smatrat će se da je danom objavljivanja ista dostavljena svim učesnicima u posrednim izborima.

**PRAVNA POUKA:** Protiv ove odluke, u skladu s članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objavljivanja ove odluke.

Žalba se podnosi preko Centralne izborne komisije BiH i dostavlja se putem faks aparata na broj 033/251-329 ili neposredno u sjedište Centralne izborne komisije BiH, Ulica Danijela Ozme broj 7, Sarajevo.

Predsjednik  
*Suad Arifović*  
Dr. Suad Arifović



Dostaviti:

1. Skupštinama kantona
2. a/a